



UNIVERSITÄTS-  
BIBLIOTHEK  
PADERBORN

**R.P. Leonardi Lessii E Societate Iesv Theologi. In D.  
Thomam De Beatitudine. De Actibus Humanis. De  
Incarnatione Verbi. De Sacramentis Et Censuris.  
Prælectiones Theologicae Posthumæ**

**Lessius, Leonardus**

**Lovanii, 1645**

Art. 2. Vtrum peccata sint propria materia huius Sacramenti.

---

[urn:nbn:de:hbz:466:1-72898](https://nbn-resolving.org/urn:nbn:de:hbz:466:1-72898)

12  
Vera dubij  
solutio.

Respondeo ergo ad dubium propositum dupliciter. Primo, non esse necessarium, ut id quod est Sacramentum tantum, sit causa eius, quod dicitur res & Sacramentum; sicut etiam id, quod est res & Sacramentum simul, non necessarium est causa eius, quod est res tantum: nam contractus coniugij, est Sacramentum tantum; coniunctio autem Christi & Ecclesie, est res & Sacramentum simul; ut docet Magister dist. 26. & Bonaventura ibidem; & tamen contractus noster non est causa coniunctionis Christi & Ecclesie. Pari ratione Character in tribus Sacramentis, est res & Sacramentum; tamen proprie non est causa eius, quod est res tantum, scilicet gratie.

Secundo responderi potest, Penitentiam, prefertim attritionem, dupliciter considerari posse: Primo, quatenus antecedit absolutionem Sacerdotis; & sic pertinere ad id, quod est Sacramentum tantum. Secundo, quatenus est absolutione posterior; & sic est res & Sacramentum simul: nam est effectus Sacramenti, scilicet actionis externae; & est causa remissionis peccatorum, quae est res tantum. Est (inquam) effectus Sacramenti, non secundum substantiam suam (nam sic antecedit); sed secundum virtutem Sacramentali; hanc enim virtutem accipit maxime à formula absolutionis, in qua potissimum est vis Sacramentalis.

ARTICVLVS II.

Vtrum peccata sint propria materia huius Sacramenti?

13  
Materia  
alia ex  
qua, alia  
circa qua,  
alia in qua.

Respondeatur Affirmatiue, esse materiam, sed remotam. Vbi nota, Triplicem esse penitentiae materiam. Prima & essentialis, est materia ex qua ipsa constat; qui sunt actus penitentis: Secunda, est materia circa quam, ut peccata post baptismum commissa: circa haec enim versatur, sicut medicina circa morbos ut expellantur. Tertia, est materia in qua, quae est ipse poenitens. Quod patet à simili. Penitentia est enim veluti quoddam anima medicamentum: triplex autem est medicamenti materia. Materia ex qua, sunt actus aegroti, & ipsum pharmacum; medicamentum enim duabus veluti partibus constat, nempe exercitatione corporis actioneque ipsius naturae; & pharmaco; in pharmaco tamen videtur esse praecipua vis curationis. Materia circa quam, sunt morbi, ut expellendi: in qua, est ipse aeger.

D V B I V M.

Cur in hoc Sacramento non sit aliqua materia externa corporalis; ut aqua, oleum, panis, sicut in alijs Sacramentis?

14  
Ratio D.  
Thomae.

Respondet D. Thomas art. 1. ad 1. in illis esse externam materiam, in quibus est excellens effectus; ut in Baptismo, in quo tollitur omnis culpa & poena: in Confirmatione, vbi datur plenitudo spiritus: in Ordine vbi datur potestas super Christi corpus verum: in extrema Vnctione, vbi praeter gratiam quae datur, etiam reliquiae peccatorum abstergentur. In effectu autem Matrimonij, & Penitentiae non cernitur huiusmodi aliqua excellentia.

15  
Alia Ratio.

His adde aliam causam, quae videtur esse praecipua & primaria: quod Penitentia, & Matrimonium sunt actus suscipientium, quos Dominus sua gratia dignatus est in Sacramenta formare, & perficere superaddita virtute efficaci gratiae: nam ex se Penitentia & Matrimonium erant valde imperfecta, & parum ad salutem utilia. Reliqua vero non sunt actus suscipientium, sed extrinsecus à ministro applicantur: vnde conuenientissimum erat, ut haberent loco materiae substantiam aliquam sensibilem. Requiritur quidem actus suscipientium in his Sacramentis, non tamen ut partes Sacramentorum, sed ut dispositiones & preparationes suscipientium, ut Sacramentum in illis vim habeat.

ARTICVLVS III.

Vtrum hac sit forma huius Sacramenti, Ego te absoluo?

16  
Respondeatur, Sufficientem formam huius Sacramenti esse, Ego te absoluo à peccatis tuis. Est communis sententia Doctorum. Et patet ex Concilio Florentino, & ex Tridentino sess. 14. cap. 3. vbi dicitur, Formam huius Sacramenti, in qua praecipue vis sita est, esse, Ego te absoluo; & additur, & caetera: per illud, & caetera, intelligens à peccatis tuis. Vbi

Aduerte, Haec omnia verba aliquo modo ad essentiam formae pertinere, scilicet, vel explicitè, vel implicitè. Ratio est: quia necesse est, omnia illa concipi ad significandum effectum huius Sacramenti, qui est liberatio à peccatis facta more iudiciali. Expressio tamen pronomini Ego non est absolute necessaria; quia implicitè, quantum satis est, continetur in verbo Absoluo. Pari ratione expressio illa, à peccatis tuis, non est necessaria; quia implicitè continetur in verbo Absoluo: Non enim potest intelligi, fieri absolutionem ab alijs, quam à peccatis, quae poenitens iam enumerauit, & censuris hisce adiunctis. Vnde explicitè ad substantiam huius formae sufficiunt haec duo, Absoluo te; ut colligitur ex D. Thoma, & vt Caietanus in Summa V. Absolutio, & alij passim.

17  
Notandum tamen est; omnem aliam orationem huius aequiualem sufficere ad essentiam huius Sacramenti; ut, Remitto, vel condono tibi peccata tua. Remittuntur tibi peccata tua. Sis absolutus. Absolutaris. Id enim commune est omnibus Sacramentis, ut orationes idem valentes, idè efficiant. Imò probabile est sufficere: Absoluat te Christus; ut patet ex forma Baptismi Graecorum: nam Christus est principalis minister: & tunc sub intelligeretur persona ministri, scilicet per me; sicut modò sub intelligitur persona Christi, cum dicitur, ego te absoluo: Absoluius enim Christi auctoritate.

18  
An, & quo modo, sit bona forma, Absolutus te Christus.

In hoc tamen casu necessarium est, ut tali forma non vtatur merè deprecatoriè, quasi rogans Christum, ut eum absoluat; sic enim non efficeretur Sacramentum: nam reuerà ipse non absolueret. Vnde D. Thomas scripsit quoddam Opusculum contra quemdam, qui dicebat formam debere esse deprecatoriam. Sed debet illa uti, tamquam ex auctoritate, intendens absoluere veluti minister sub Christo. Esset enim graue peccatum tali forma uti, quae Sacramentum redderetur ambiguum: